

1Timoteo

Timoteo veize Paulo'a

Mirihirote'e So'ağa Ibi'a

Ihore Ġoe'a

So'a 'ahi'e Paulo'a Timoteo veize mirihiro. Timoteo moga'e Giriki vazega zu vi'a'e Iuda rogaega. Timoteo'e Paulo teite harama ragave'ena'a, ani dananiro. Paulo'a ibite Timoteo teite Efeso ekalesia veize gauiro ebu Timoteo'a ze ibitozoga veize ani e'ea modiro. Timoteo'e Efeso ekalesia veize gaue'ete'e zamağano Paulo'a so'a 'ahi mirihiro. E'e madağano ġuriro ihore azağani'a ekalesia tutuze ve'orinu 'ahine, Paulo'a zege ihore'e ve'oğa rae fureniro, zu ekalesia azağa'e zege goere ago hegoto'i rae ihoziro. Ebu ekalesia ibitozi'ete'e azağa'e nougenouge radite'e zu nougenouge gauite'e moneo goeriro. Ebu Iesu Keriso tuğure vazega manoga rouga veize zu ekalesia azağa nunu veize nougenouge gauite'e moneo Timoteo iraduguniro.

¹ Ege, Paulo'a so'a 'adi mirihe'ohe. Badi'a'e emege gabofe'ete'e vazega, zu Keriso Iesu'e eme'a fie'ena'a guhine radiu'ete'e vazega. Badi'a zu Iesu'a ege ohotadu e'e Keriso Iesu apostolo vazegano reiro.

² So'a 'adi'e Timoteo, gae mazao mirihe'ohe. Ġa'e hube hune ege ubude, mazağa e'a gae mazao haramadu gae zuni Iesu mazao firo.

Badi'a emeḡe Mama zu emeḡe Zuhi'a Boro Keriso Iesu'a ḡae mazao manōḡa zu vetuḡa ebu zama roḡeḡa ḡane'eno'i.

Ḡuriro Ihore Azaḡa mazao Riḡa Iraduguziro

³ E Makedonia haba'a u'a iḡunirotene inare ḡeirote'e teige, ḡa Efeso zamaḡano rado'i. E'ea radiu'ena'a, vaze nu'a ḡurire ihoreḡa ihoze'ete'e gararo'i.

⁴ Ebu ze amahi irihineḡa zu vouḡaze ni moneo mene ufeta zamare gauifine riḡa ḡorezo'i. 'Uguḡani'a ta'iro furene'ohe, ebu Iesu mazao fie'ete'e azaḡa ḡabozoga veize Badi'a'a haḡae'ete'e gauḡa moneo mene hune ihoze'ohe.

⁵ Eḡe'a 'ahige riḡa iho'e'eta'a'e vaze'a zamarotitoga veize ra'ohe. Vaze zamarotitoga'e zama deheḡanono'o zu duduḡa rae zamare'ete'e haḡae'ete'eano'o zu ihore huga hube hune mae ḡihine'ete'eano'o fureru'ohe.

⁶ Rehano vaze nu'e ihore huga 'adi modadu huga o'o'ano ta'iro'tite'ete'e hegote'ohe.

⁷ Ze'e Mose goro ḡoe'a ihoze'ete'e azaḡa reihi ra'ohe. Rehano ze zeḡe'a bare nagini ra'eta'a'e aḡu'a, ebu ze'a hube hune rae ra'ete'e ḡauḡa moneo zuni aḡu'a.

⁸ Eme edeḡa, vaze'a ibi duduḡano Mose goro ḡoe'a hegotine, Mose goro ḡoe'a'e manōḡa.

⁹ Rehano eme edeḡa, Mose goro ḡoe'a'e duduḡa azaḡa veize mene haḡairo. A'e goro ḡoe'a varade'ete'e azaḡa, Badi'a mene hegote'ete'e azaḡa, Badi'a mene gubane'ete'e azaḡa, sau'a haḡae'ete'e azaḡa, Badi'a ḡoereo mene zaḡozaḡe'ete'e azaḡa, Badi'a mazao mene

kurau'ete'e azağa, vi'a moga ga vaze goruze'ete'e azağa,

¹⁰ ubuma ġezo azağa, ohoze'a ohoze teite zu roġae'a roġae teite daroe'ete'e azağa, vaze oboze teadu seroze'ete'e azağa, ġurire'ete'e azağa, ko-tao ġurire'ete'e azağa, ebu ihore duduğa heza-hohau'ete'e ġauğa nunu hegote'ete'e azağa veize haġairo.

¹¹ Ihore huga'e Iesu hari manoganono'o ariro. Hari manoga a'e eme'a nigune'ete'e Badi'ağa ġihi'aġani'a rae furenadu eġe'a vaze ihozifine iniro.

Badi'a'a Paulo Vetuġahiro.

¹² Keriso Iesu emeġe Zuhi'a Boro'a inarahirote'e moneo eġe'a ani mazao manoga tauġi ra'ohe, mazağa ani'a e hube hune ani mazao fie'ete'e vazega rae zamaradu ane gau haġaifine ohohiro.

¹³ E ibite Iesu rae sausauniro, zu ani hegote'ete'e azağa aduga ziniro, zu utiutiga reiro. Rehano e ani mazao mene firote'e madaġano ani aġu'a radu 'ouge haġairote'e u'ano, Badi'a'a eġe vetuġahiro.

¹⁴ Emeġe Zuhi'a Boro Badi'a'a manoga borofe iniro 'ahine, e Keriso Iesu teite tiburhanadu ani mazao fie gigaru'ohe, ebu ani zu vaze zamare borofe'ohe.

¹⁵ "Keriso Iesu'a sau'a azağa ġabozoga veize raha 'adi ariro," rae ra'ete'e ġoe'a'e huga, zu vaze nidu'a mae ġihinite'e ġoe'a. Ebu e'e sau'a azağa bo'aġano ufeta sau'a hune vazega.

¹⁶ Rehano Badi'a'a vetuġahiro. A'e, ufeta sau'a hune vazega, eġe veize Keriso Iesu'a mada faġa

zamaġa obone tirota'a'e vase nidu'a ihozifine, ebu zeġe zuni ane mazao fiadu ġabone tuġutuġu hidifine ra'ohe.

¹⁷ Radium tuġutuġu Kiniġa, mene rudatite'e zu mene horone'ete'e Badi'aġa tibuhuga gubanihi ebu niġa mae ġihinihi, onamo tuġutuġu! Amen.

Paulo'a Timoteo Inaraniro

¹⁸ Timoteo, eġe ubude, ibite vase'a ġae moneo Badi'a ġoere rae furenirote'e idunaġano, eġe'a ġoere 'ahi iho'e'ohe. Ġa ze'a rae furenirote'e ġoe'a hegote'ena'a, Keriso hari manaġa veize faine utito'i.

¹⁹ Ihore huga mae ġihino'i, zu nagini'e duduġa ga ve'oġa rae faine zamaradu duduġa da'o haġao'i. Vaze nu'e zeġe'a bare zamaroneze duduġa hezahoharo zu ġasi'a fahau zubure'ete'e teige, ze'a fie'ete'e'a dauġiro.

²⁰ Zeġe bo'aġano Himenaio zu Alesana'e eġe'a Satani 'evoreo ri'iziro. Ze aduga hidadu Badi'a mene bare rae sausaunoga veize eġe'a ihozihi reiro.

2

Nougenouge Kurau'ete'e moneo Ihoniro

¹ E'ano'o e ibite geno ġoere 'ahi inare ġa'ohe. Vaze nidu'a urate'ete'e ġauġa Badi'a mazao umido'i, zu zeġe veize kurano'i, zu vase 'ahoga'ahoga veize kurano'i, ebu zeġe nidu'a veize Badi'a mazao manaġa tauġi ro'i.

² Nize boro azaġa nidu'a ebu kini veize kurano'i. 'Ougine, eme Badi'a hube hune

gubane'ena'a zu zaḡozaḡe haḡae'ena'a, zama roḡeḡa huneo sifu radi'uma.

³ 'Ouge kurau'eta'a'e manoḡa, zu emeḡe ḡabofe'ete'e Badi'aḡa matu'ohau'ete'e haḡaiḡa.

⁴ Badi'a'e vaze nidu'a ḡabone hidoga zu ze'e ihore huga ederadu mae ḡihinoga urate'ohe.

⁵ Badi'a'e tibuhuga, ebu Badi'a zu vaze bo'aḡano nema vazeḡa zuni tibuhuga. Ani'e vaze, Keriso Iesu.

⁶ Ani'a vaze nidu'a haḡaize sau'anono'o bo-haze buzoga veize ane bare dibu'iro. Ebu ani Badi'a'a ohonirote'e madaḡano 'ouge haḡadu Badi'a'a vaze ḡabozite'e rae fureniro.

⁷ Hari manoḡa e'e rae furenifine, Badi'a'a e'e haramo vazeḡano zu apostolo vazeḡano ohohiro. Ebu Iuda mene azaḡa mazao hari manoḡa huga ihozadu ze Iesu mazao fioḡa veize, e zeḡe ihore vazeḡano ohohiro. E huga ḡoere'ohe zu mene ḡurire'ohe.

⁸ E ohozeohoze'a haba nidu'a zamaḡano Badi'a mazao kuranoga urate'ohe. Ebu ze mene maḡune'ena'a, mene rotete'ena'a, zu zaḡozaḡe radiu'ena'a, 'evoreze mae ḡihinadu kuranoga e urate'ohe.

⁹ Ebu roḡaeroḡae zuni dabua idaidaḡa faine vidanoga, iguze mene nunufe si'oga, ebu hadi naeḡa boro zu naeḡa boro dabuaḡa mene vidanoga urate'ohe.

¹⁰ U ze haḡai manoḡa haḡadu ze zeḡe'a bare Badi'a gubane'ete'e roḡaeḡa rae furenoga urate'ohe.

¹¹ Roḡae'e ihore azaḡa 'u'uḡano ḡoereze nidu'a egohanadu sifu edeḡa me'uma.

¹² E roḡae'a ohoze ihozoga zu ibitozoga mene idaḡa ra'ohe. Ze sifu radi'uma.

¹³ Mazaḡa Adamu'e Badi'a'a ibite haḡairo ebu hena Eva haḡairo.

¹⁴ Satani'a Adamu mene so'oniro, rehano Eva so'onadu ani'a haḡai sau'a haḡairo.

¹⁵ Rehano roḡae'a iḡaiḡa Iesu mazao fie'ena'a, vaze zamare borofine ebu zaḡozaḡe'ena'a faine radiune, ze'a ene furene'ete'eano'o* Badi'a'a ḡabozi'uma.

3

Ekalesia Ibitozi'ete'e Azaḡa Haḡai

¹ Ḡoere 'ahi'e huga: Iniu ekalesia ibitozi'ete'e vazega reihi rae ra'ete'e vazega'e gau manoga tauḡi haḡaihi re'uma.

² E'ano'o ekalesia ibitozi'ete'e vazega'e vaze'a ve'oga rae ra'ete'e haḡaiḡa mene haḡai'uma, inuga tiba da'o me'uma, faine zamare'ena'a gaui'uma, ane'a bare haḡai sau'a hezahoha'uma, ani'e vaze'a gubani'uma, i'udo azaḡa mae zouzadu ḡubuzi'uma, zu vaze faine ihozoga'e idaḡa rae ra'ete'e vazega re'uma.

³ Ani'e vu sau'a mene ufeta gagi'uma zu mene utiutiḡa re'uma, rehano roḡeru haḡai'uma, mene roteti'uma, zu hadi ubumaḡa mene re'uma.

⁴ Ani'a ane neo tibururu radiu'ete'e azaḡa faine ibitozi'uma zu ubugaubugani'a hube hune ani gubane'ena'a ani ḡoere egohafine ihozi'uma.

* **2:15 2:15** ze'a ene furenadu taufe'ete'eano'o

⁵ Iniu ane neo tiburu radiu'ete'e azaḡa mene faine ibitozi'ete'e vazēḡa'e nougenouge ekalesia ibitozi'uma?

⁶ Ekalesia iziga'e ekalesia ibitozi'ete'e vazēḡa iḡurio mene ohoni'uma. Ani'e iḡuri e'e meine, ane'a bare niḡa mae itadu Badi'a'a Diabolo kotanirote'e teige, ani zuni kotani'uma gaogi.

⁷ Ekalesia ibitozi'ete'e vazēḡa'e mene ekalesia azaḡani'a zuni gubane'ete'e vazēḡa re'uma. 'Ougine, ze'a ani mene rae sausauni'uma zu Diabolo 'ahirio ani mene 'ahirini'uma.

Diakono Azaḡa Haḡai

⁸ Diakono azaḡa zuni ekalesia ibitozi'ete'e azaḡa teige vase'a gubaze'ete'e azaḡa re'uma, ḡoere huga da'o re'uma, vu sau'a mene ufeta gagi'uma, zu hadi ubumaḡa mene re'uma.

⁹ Ze zama deheḡa hina duduga da'o zamare'ena'a, Badi'a'a 'u'uru teadu rae furenirote'e ihoreḡa huga 'aune mae ḡihini'uma.

¹⁰ Vaze 'izema ohozogano ze faine udahi'uma ebu zeḡe mazao ve'oḡa o'o'a reine, diakono iḡurio ohozi'uma.

¹¹ Diakono azaḡa teige, inudeze zuni vase'a gubaze'ete'e roḡaeḡa re'uma, vase mene rae sausauni'uma, faine zamare'ena'a gaui'uma, zu gau nidu'a'e zamaze nidu'a hina haḡai'uma.

¹² Diakono azaḡa zuni inuga tiba da'o me'uma, ebu ane ubugaubuga zu ane neo tiburu radiu'ete'e azaḡa faine ibitozi'uma.

¹³ Diakono gauḡa faine haḡae'ete'e azaḡa'e vase'a nize mae ḡihini'uma, ebu ze zeḡe'a Keriso Iesu mazao fie'ete'e moneo ufeta borofe rae fureni'uma.

Badi'a'a Ihore Huga rae Fureniro

¹⁴ E ġarihe amihi rehano, izidi ġae mazao ġoe'a 'ahi mirihe'ohe,

¹⁵ mazaġa e mene ġarihe amine, vaze'a Badi'a mone nego nabudi bo'aġano nougenouge haġae radite'e moneo ġa iho'ifine ra'ohe. Badi'a mone nego nabudi'e ġabode radiu'ete'e Badi'aġa mazao fie'ete'e ekalesiaġa. Ebu ne ogoru'etene raha hu'i sebanadu gado ohone'ete'e teige, ze'e ġoere huga rana edau gigaru'ohe.

¹⁶ Zuhi'a Boro mazao kurau'ena'a radiu'ete'e ġaboneġa moneo Badi'a'a rae furenirote'e ġoe'a'e ġihi'a hune. Vaze nidu'a ġoere a'e huga ra'ohe:

Ani'e vazeo fureraro,

Vine Zaġoġani'a ani'e duduġa rae fureniro,

ani'e tuġure vigavigani'a horoniro,

vaze'a ani moneo haba'ahaba'ano haramiro,
raha azaġani'a ani mazao firo,

ebu Badi'a'a ani adure ġoha mae itadu e'ea
ani'e ġihi'a hune rae reiro.

4*Ġuriro Ihoreġa Azaġa*

¹ Vine Zaġoġani'a 'ahige deheru ra'ohe. Vesu vaze nu'a ihore huga mae ġihine'ete'e modadu so'oso'o viga zu vine sau'a ihoreġa hegoti'uma.

² Ihore 'uguġa'e zama guhi azaġa ġuriro ġoe'anono'o are'ohe. Ze aġu'a, zeġe zamarone'e auri gigi'aġa hina hufirote'e teige rudanadu zeġe ihore'e ve'oġa.

³ Ze vaze mazao, "Ago hahuro'i," ebu "Ogomu nu'e ago ano'i," rae ra'ohe. Rehano ogomu

'uguḡa'e Iesu mazao fie'ete'e zu ihore huga edere'ete'e azaḡani'a Badi'a mazao manōḡa tauḡi radu anoga veize Badi'a'a haḡadu rifiro.

⁴ Mazaḡa Badi'a'a haḡairote'e ḡauḡa nidu'a'e manōḡa. Eme ani mazao manōḡa tauḡi radu e'e aune, ḡauni 'ahoga mene hezahoha'uma.

⁵ Mazaḡa Badi'a ḡoere ebu eme'a ogomu veize manōḡa tauḡi rae kurau'ete'e u'ano, ogomu nidu'a'e zaḡoḡa.

Iesu Keriso veize Gaue'ete'e Vazeḡa Manōḡa

⁶ Ḡa eḡe ḡoere 'adi nego nabudi faine ihozo'i. 'Ougine, ḡa'a mae ḡihine'ete'e ḡoe'a huga zu hegote'ete'e ihoreḡa huga hina ufeta ḡuhuradu Keriso Iesu veize gaue'ete'e vazeḡa manōḡa re'uma.

⁷ Badi'a rae sausaune'ete'e ḡuriro hariḡa zu vouḡaze irihine hezahohano'i. Rehano Badi'a gubane'ena'a radoga veize ḡa ḡae bare taufo'i.

⁸ Ahiri faine taufine, manōḡa nu me'uma. Rehano Badi'a gubane'ena'a radiune, ḡau nidu'a ibiḡano manōḡa hidi'uma. Manōḡa a'e izidi madaḡano zu zama moneo Badi'a'a rifi'uma rae ḡoitorirote'e ḡaboneḡa.

⁹ Ḡoere a'e huga, zu vaze nidu'a mae ḡihinite'e ḡoe'a.

¹⁰ Eme Badi'a'a ḡoitorirote'e ḡaboneḡa hidifine, ḡihau gaue inare'ohe, mazaḡa eme'e ḡabode radiu'ete'e Badi'aḡani'a e'e rifi'uma rae mae ḡihine'ohe. Ani'e vaze nidu'a ḡaboze'ete'e zu ani mazao fie'ete'e azaḡa ufeta hune ḡaboze'ete'e Badi'aḡa.

¹¹ Za ihore 'adi riḡa zo'i ebu ihozo'i.

¹² Ĝa'e tahi'a iziga radu vase 'ahogani'a ĝa ovoj ĝiaoga gararo'i. Rehano ĝa'e fie'ete'e vazega radu faine ĝoero'i, faine haĝao'i, vase zamare borofo'i, Iesu mazao hube hune fio'i ebu zama deheĝa hina Badi'a ubumao haĝai duduĝa haĝao'i. 'Ougine, fie'ete'e azaĝani'a ĝa tuhutuhu'i'uma.

¹³ Vaze ubumao Buka Zaĝoĝa me'odoga, haramoga zu ihozoga veize inaro'i, onamo eĝe'a ami'uma.

¹⁴ Ekalesia ibitozi'ete'e azaĝani'a ibite 'evoreze ĝae rana teadu Badi'a ĝoere rae furenrotene, ĝa Badi'a mazaono'o ĝahunone hidiro. Ĝahunone a'e ago re'ore'ono'i.

¹⁵ 'Ahiguĝa nidu'a ĝae'a zamaĝo nidu'a hina inare haĝadu ĝa'a ufeta ĝuhure'eta'a'e vase nidu'a ihozo'i.

¹⁶ Gaboneĝo zu ihoreĝo faine ĝiano'i. E ĝate'e 'aune haĝao'i. 'Ougine, Badi'a'a mene ĝae da'o, rehano ĝae ihore igi'ete'e azaĝa zuni ĝabozo'i'uma.

5

Ekalesia Azaĝani'a Haĝaite'e Haĝaiĝa moneo Ihoniro

¹ Ohoze vouĝa riĝa ago rono'i, rehano mogo teige iraduguno'i. Ohoze iziga'e negoĝo teige iraduguno'i.

² Roĝae vouĝaĝa'e vi'u teige iraduguno'i. Roĝae iziga'e hube hune zamaĝo deheĝa hina ezeĝo teige iraduguzo'i.

³ Dananoga vazega o'o'a ĝozobaĝa nidu'a gubazo'i.

⁴ Rehano ḡozoba 'ahoga'e tahi'aḡeta ga aḡiḡeta reine, tahi'aḡa zu aḡiḡani'a zeḡe neo tiburu radiu'ete'e azaḡa ibite geno taufo'i rae ihozi'uma.* Ebu vize moze zu aḡize'a ubudeze faifairu tau-firote'e moneo, ubudeze zuni vize moze zu aḡize mazao barono'i rae ihozi'uma, mazaḡa a'e Badi'a matu'ohau'ete'e haḡaḡa ra'ohe.

⁵ Dananoga vazeḡa o'o'a zu ane da'o radiu'ete'e ḡozobaḡa'e Badi'a'a hube hune ani danani'uma rae mae ḡihine'ena'a, ohere zu madai 'aune umide kurau'ohe.

⁶ U iniu raha matu'uḡa veize da'o radiu tauḡe'ete'e ḡozobaḡa'e ḡaboga rehano, rune ḡozobaḡa ra'ohe.

⁷ Vaze'a ekalesia azaḡa'e ve'oḡa rae mene rozifine, 'ahiguḡa ekalesia azaḡa ihozo'i.

⁸ Iniu nabuga mene taufe'ete'e vazeḡa zu nabuga bo'aḡano ane neo tiburu radiu'ete'e azaḡa mene ufeta taufe'ete'e vazeḡa'e ani'a fie'ete'e o'onirote'e vazeḡa. Ani'e sau'a, u mene fie'ete'e vazeḡa'e ani vitinoga.

⁹ Iniu muriḡa 60 vitinoga zu ḡae tiba da'o hahurirote'e† ḡozobaḡa reine, ekalesia'a danazite'e ḡozobaḡa nizeo zouzi'uma.

¹⁰ Ebu ani'a gau manōḡa haḡadu vaze'a nigune'ete'e ḡozobaḡa rae re'uma. Ani'e ubugaubuga faine taufi'uma, vaze mae zouzadu ḡubuzi'uma, Badi'a mone azaḡa veize tuḡure vazeḡa teige gau'i'uma, aduga hide'ete'e azaḡa danazi'uma, ebu haḡai manōḡa nidu'a haḡaifine

* **5:4 5:4** ze ibite Badi'a mazao fie'ete'e azaḡa haḡaḡa ederi'uma

† **5:9 5:9** ize mazao zama tibano haḡaidote'e

inari'uma.

¹¹ Ġozoba iziga ro'idene ġozoba nizeo ago to'i. Mazaġa ze ahiri ura haġaihi rae zamare'etene Keriso veize gaue'ete'e modadu hahurihi ra'ohe.

¹² E'ano'o ze ibite Keriso mazao ġoitorirote'e ġoe'a vari'adu vase'a ze sau'a haġairo rae re'uma.

¹³ Ebu ze'e tubuġa radu ne 'ahoga'ahogano ragave tauġe'ete'e haġaiġa hegoti'uma. Mene tubuġa da'o, rehano vase dudizi'uma, vase gauo ġunuġuni'uma, ebu mene reite'e ġoe'a re'uma.

¹⁴ E'ano'o eġe'a, ġozoba iziga bare hahuradu ze ubudeze furezo'i ebu neze faine taufo'i rae iraduguze'ohe. 'Ougine, ze ve'oġa 'ahoga mene haġadu agire vaseġani'a ze rae sausauzoga mene idaġa re'uma.

¹⁵ Ġozoba nu'e amahi Keriso modadu Satani hegotiro.

¹⁶ Ekalesia roġae 'ahoga, ane nabuġa bo'aġano ġozoba nu e'e reine, ani'a ze danazi'uma ebu ekalesia mazao ze danazoga mene umizi'uma. 'Ougine, ekalesia'a iniu danazoga vaseġa o'o'a ra'ete'e ġozobaġa huga nidu'a da'o danazi'uma.

¹⁷ Ekalesia ibitozi'ete'e azaġani'a ekalesia faine ibitozine, ekalesia azaġani'a ze ufeta hune gubazi'uma. Zeġe bo'aġano haramo azaġa zu ihore azaġa veize ufeta hune gubazi'uma.

¹⁸ Mazaġa Buka Zaġoġano 'ahige ra'ohe, "Vaze'a boromakau hina vuidi hirive'ete'e‡ madaġano boromakau zuni vuidi afine hebeze

‡ **5:18 5:18** Iuda azaġa hirive'ete'e ibiġa amahiġa. Boromakau'a vuidi rana oname onae'ena'a, vuidi ogaġa gomake vagine'ohe.

ago furu'o'i,"☆ zu "Gau vazegani'a ane gau naega me'uma."☆

¹⁹ Ekalesia ibitozi'ete'e vazega 'ahogani'a ve'oğa hağadu kotao ohonihi reine, ane ve'oğa rae furene'ete'e azağa aheu ga uğidu vağoi. 'Uguğa azağa o'o'a ro'idene, ani kotao ago ohono'i.

²⁰ Ekalesia ibitozi'ete'e azağani'a sau'a 'aune hağaine, ekalesia azağa ubumao rozo'i. 'Ougine, vase 'ahoga'ahoga zuni sau'a hağaoga ri-honi'uma.

²¹ Badi'a zu Keriso Iesu ebu Badi'a'a ohotirote'e tugure viga ubumao e riğa ga'ohe. Goere 'adi hegoto'i. Ga'a vase nidu'a mazao mene inahena'a, idane hağao'i.

²² Ekalesia ibitozi'ete'e azağa ohozo'idene, zege rana 'evorego ago garihe to'i. Vaze sau'ano ago 'auğoi, rehano ga gae'a bare gia'e'ena'a, deheğano radiu'eno'i.

²³ Izidiono'o vu isoğa da'o ago gago'i, rehano gae isi veize zu gae gehağa ma'ete'e ugiğa'e manoroga veize vaini vuğa tahiğa zuni gago'i.

²⁴ Vaze nu'a hağai sau'a furene hağadu ze 'izema kotazogano hağaize sau'ani'a fureru'ohe. U nu'a hağaize sau'a'e 'u'uru teadu vesu'u fureru'ohe.

²⁵ E'e teige, hağai manoga'e deheru fur-eranadu vase'a edere'ohe, ebu hağai manoga 'u'uruğa zuni mada 'ahogano fureranadu vase'a edere'ohe.

6

¹ Ekalesia azağa bo'ağano tuğure azağani'a zeğē zama nidu'a hina zuhi'aze gubazi'uma. 'Ougine, vase'a Badi'a ni zu emeğē ihore mene rae sausauni'uma.

² Tuğure azağa zeğē zuhi'a'e fie'ete'e azağa reine, zuhi'aze'e zeğē ekalesia nabuga radu mene ovoe ġiazi'uma. Rehano tuğure azağa'e zuhi'aze veize ufeta gau'i'uma, mazağa zeğē gauono'o manōga hide'ete'e azağa zuni fie'ete'e azağa zu Badi'a zamarone azağa.

Ġuriro Ihoreğa Azağa

Ġoere 'adi ekalesia azağa ihozo'i ebu e'e hego-tifine inare zo'i.

³ Vaze nu'e ihore 'ahoga ihoze'ena'a, emeğē Zuhi'a Boro Iesu Keriso ihoreğa huga zu Badi'a gubane'ete'e ihoreğa mene mae ġihine'ohe.

⁴ Ze zeğē'a bare nize mae itadu ġauni 'ahoga mene edere'ohe, zu vase teite rotetihi zu ta'irotihi ra'ohe. E'e u'ano, ahiahi, roteto, vase rae sausauze'ete'e'a fureru'ohe ebu zamarone sau'ani'a vase 'ada'adaze'ohe.

⁵ Ebu zamaze'a ufeta sautaro zu ze ihore huga modiro. E'ano'o hadi hidoga veize ze Badi'a gubane'ohe zu zeğē bo'ağano roteto'a 'aune fureru'ohe.

⁶ Rehano eme'a ġau nidu'a moneo idağa da'o rae zamare'ena'a, Badi'a gubane'ete'e ibiğano radiune, manōga boro hidi'uma.

⁷ Eme raha 'adao ahiri isoğa fureraro ebu ahiri isoğa ruda'uma.

⁸ E'ano'o ogomu zu dabua'e emeğē mazao e'e reine, a'e idağa rae re'uma.

⁹ Ma'ora vazegā reihi ra'ete'e azaḡani'a sau'a haḡaihi rae ra'ete'e zamaḡano uite'ohe. Ebu ze 'ahirizeadu kauriḡa zu zamarone sau'a zamaḡano diuḡe'ohe. 'Ougadu ze ruize'ete'e zu sausaufe'ete'e ibiḡano uite'ohe.

¹⁰ Sau'a nunu nidu'a'e hadi ubumaḡaono'o fureru'ohe. Vaze nu'a hadi ufeta mouga veize, fie'ete'e modadu ragaviro ebu aduga boro hidadu zamaze ufeta adudaro.

Ihore Ġoe'a Ġonaga

¹¹ Rehano ḡa, Badi'a mazao fie'ete'e vazegā, haḡai sau'a 'uguḡanono'o vaḡino'i. Ebu Badi'a ubumao haḡai duduḡa haḡaoga, Badi'a gubanoga zu fioga, vaze zamare borofoga, aduga zamaḡano zamaḡo obone touga, zu roḡeru haḡaoga veize inaro'i.

¹² Ġae'a fie gigaru'ete'e veize faifairu utito'i ebu ḡabone tuḡutuḡu mo'i. E'e veize Badi'a'a ḡa huḡadiro, ebu vaze ḡehaḡani'a ḡae ḡoere igirotene, ḡa zeḡe ubumao ḡae'a fie'eta'a'e huga rae fureniro.

¹³ Ġau nidu'a ḡabone zini'ete'e Badi'aḡa ubumao zu Pontio Pilato ubumao huga da'o rae furenirote'e vazegā, Keriso Iesu ubumao eḡe'a ḡoere 'ahi riḡa ḡa'ohe.

¹⁴ Ġa ve'oḡa 'ahoga ga vaze'a ḡa'e roḡadite'e haḡaiḡa 'ahoga ago haḡao'i, ebu eḡe ḡoere 'adi 'aune hegoto'i, onamo emeḡe Zuhi'a Boro Iesu Keriso'a bari'uma.

¹⁵ Badi'a'a ohonirote'e madaḡano Keriso tuḡuni'uma. Badi'a'e eme'a nigunite'e vazegā,

zu eme Zuhi'afi'ete'e Vazeḡa tibuhuga, zu Kini Ḡihi'aḡa Hune, zu Zuhi'a Boro Ḡihi'aḡa Hune.

¹⁶ Ani tibuhuga da'o mene rudau'ohe ebu agaḡa huneo radiu'ohe. Vaze'a e'e agaḡa uhiḡa hune onamoga'e mene idaḡa. Vaze 'ahogani'a ani mene horoniro zu horonoga'e mene idaḡa. Ani gubanihi. Ani'a inaraḡa hina zuhi'afi'uma, onamo tuḡutuḡu. Amen.

¹⁷ Izidi madaḡano ma'ora azaḡa 'ahige riḡa zo'i. Ze zeḡe'a bare nize mene mae iti'uma. Ebu mene radiu tuḡutuḡe'ete'e toheḡa mene zamare borofi'uma, rehano eme matu'e radoga veize ḡau nidu'a borofe rifi'ete'e Badi'aḡa ufeta zamare borofi'uma.

¹⁸ Ebu ze haḡai manōḡa zu gau manōḡa ḡehaḡa haḡai'uma, zu ḡahugone zamaroneḡa hina ḡauze zahara azaḡa teite matu'e ḡahugi'uma.

¹⁹ Ze 'ouge haḡaine, ze'a zeḡe veize ḡau manomano adureo ragateragate teadu zama mo-neo ḡabone huga hidi'uma.

²⁰ Timoteo, Iesu'a ḡanirote'e ihoreḡa huga faine ḡiano'i. Badi'a mene gubane'ete'e ḡoe'anono'o zu huga o'o'a ta'iroḡanono'o vaḡino'i. Edeḡa boro rae ḡuriradu ihore huga hezahohau'ete'e azaḡa mazaono'o vaḡino'i.

²¹ Guriro ihoreḡa e'e rae furenirote'e azaḡa nu'e zeḡe'a finuta'a'e modiro.

Badi'a'a zae mazao manōḡa furene'eno'i.

Buka Zaḡoḡa Ġoitore Iziga
The New Testament in the Uare language of Papua
New Guinea

Nupela Testamen long tokples Uare long Niugini

copyright © 2017-2024 Wycliffe Bible Translators, Inc.

Language: Uare

Translation by: Wycliffe Bible Translators

Contributor: Global Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-08-11

PDF generated using Haiola and XeLaTeX on 11 Aug 2025 from source files dated 11 Aug 2025

c398f744-e34b-525a-a9fe-d04e84ab7b13